

**Qanoq iliornikkut uumassusileqatigiiat nunanit allaneersut ajornartorsiutaanerata pinngitsoortissinnaanissaanut iliuseqartoqarsinnaanersoq, nunatsinni uumasooersut innarlerneqannginnissaat pillugu apeqquteqaat aallaavigalugu oqallisissiasatut siunnersuut**  
(Inatsisartunut ilaasortaq Aqqalu C. Jerimiassen, Atassut)

### **Akissuteqaat**

(Nunalerinermut, Imminut Pilersornermut, Nukissiutitut Avatangiisinullu Naalackersuisoq)

### **Siullermeerneqarnera**

Naalackersuisut sinnerlugit Inatsisartunut ilaasortaq Aqqalu C. Jerimiassen, Atassut, Qanoq iliornikkut uumassusileqatigiiat nunanit allaneersut ajornartorsiutaanerata pinngitsoortissinnaanissaanut iliuseqartoqarsinnaanersoq, nunatsinni uumasooersut innarlerneqannginnissaat pillugu apeqquteqaat aallaavigalugu oqallisissiasatut siunnersuummik saqqummiussineranut qutsavigerusuppara.

Pinngortitaq allanngorartuuvoq, aammalu sinaakktissat, uumassusileqatigiiat unammilleqatigiinnissaannut aalajangiisuusartut allanngortarneri malillugit uumassusileqatigiiat takkuttarput tammartarlutillu. Taamaattumik uumasut nunap killeqarfiinik ilisimasaqanngimmata ersarissassallugu pingaaruteqarpoq.

Nerlernaarsuk Kalaallit Nunaannut tikittuunngilaq, naak Canadap nerleranik taaneqartaraluarluni. Tassami Kalaallit Nunaat pinngoqqaarnerminiilli siaruarfigisarpaat. Uumassusileqatigiiat nunanit allaneersutut taaneqassagunik pinngoqqaarnerminiilli siaruarsimaffimminiit nassartorneqarsimasussaapput eqqunneqarsimasussaallutilluunniit, aammalu nunatsinni uumasooersumut imaluunniit uumasooersunut sunniuteqarnerlussimasussaallutik. Nerlernaarsuk tunngavissanik taakkununga naammassinnissimangilaq.

Taamaattumik nerlernaarsuk Kalaallit Nunaanni uumassusillit assigiinngissitaarnerinut periusissiaq 2030-mi anguniagaq 1-imi anguniakkap immikkoortuata 3-p naammassineqarnissaanut tunngatillugu maleruagassiuiffigineqartariaqanngilaq.

Naalackersuisunili isumaqarpugut, nunatsinni uumassusillit assigiinngissitaarnerinik illersuinissamik kissaateqarnitsinnut, ilaatigut Kalaallit Nunaanni uumassusillit assigiinngissitaarnerinut periusissiami anguniagaq 1-imi anguniakkap immikkoortuani 2-mi saqqummiunneqartumut naapertuulluinnartoq:

*2030-mi uumassusileqatigiiaat asseqanngitsut, qaqutigoortut ulorianartorsiortullu piujuartinniarneqarnerini killiffik isumannaatsuussaaq, imaluunniit silap pissusianut periarfissatut ilusiliat nutaat atuunneri malillugit pitsanngorsimassalluni.*

2020-mi § 37 naapertorlugu apeqquteqaammut 38-mut akissuteqaammi allassimavoq, silap pissusiata allannguutai Kalaallit Nunaanni nerlerit ikilinerinut peqqutaaqataasimasinnaasut Pinnngortitaleriffimmiit naliliiffigineqartoq. Akissuteqaat taperserniarlugu Kalaallit Nunaanni nerlernik ingerlatsinerimut pilersaaruserneq, kiisalu Kalaallit Nunaanni nerlerit nerlernaarsuillu assigiinngissutaat pillugit paasititsiniaaneq periarfissaasinnaavoq.

Aamma Pinnngortitaleriffiup nerlernaarsunnik kisitsinissaa, Kalaallillu Nunaata nerlerisa ulorianartorsiorneri pillugit nassuiaasiornissaa, kiisalu nerlernaarsuit amerlassutsimikkut ineriartornerinik alapernaarsuinissaa periarfissaasinnaavoq. Suliassalli taamaattut taamaallaat Pinnngortitaleriffiup aningaasaliiffigineqaqqinneratigut isumagineqarsinnaapput, isumalluutiminnik taamaallaat uumassusileqatigiiaanut, Kalaallit Nunaannut niuernikkut pingaarutilinnut atuinissartik salliutittarmagu.

Naalackersuisuniit taamatut oqaaseqarluta apeqquteqaat tunngavigalugu oqallittoqarnissanut qilanaarpugut.